

Beamten – 12.02.2019

Wann ee vu Beamte schwätzt, da kënnen 2 Gruppe vu Leit gemengt sinn, nämlech d'Staatsbeamten an d'Gemeengebeamten. D'Staatsbeamte ginn och nach „Fonctionnairë“ genannt. Si schaffen am ëffentlechen Déngscht vum Staat. Et schwätzt een och oft vun der „Fonction publique“.

E Staatsbeamten huet e speziell Aarbechtsverhältnes, dat sech zum Beispill vum private Salarié ënnerscheet. E Beamteschafft fir de Staat, also fir d'Allgemengheet. E private Salarié dogéint schafft fir eng privat Entreprise, also fir privat Interessen. E weideren Ënnerscheed ass, dass d'Staatsbeamten net streiken dierfen a si net entlooss kënnen ginn, am Géigesaz zum private Salarié.

Fir zu Lëtzebuerg dierfe Staatsbeamten ze ginn, muss ee mindestens EU-Bierger sinn. Allerdéngs muss ee fir verschidde Postelëtzebuerger sinn. Dëst ass zum Beispill de Fall fir Beamte bei der Police ze ginn. Doriwwer eraus muss een de sougenannte Staatsexamen gepackt hunn. Jee no Positioun gëtt eng bestëmmt Ausbildung virausgesat a je no Ausbildungsniveau kënnen e Staatsbeamten an eng bestëmmt Carrière, déi definéiert, wéivill ee verdéngt.

All Staat huet Beamten, déi dofir do sinn, d'Geschäfte vum Staat a vun der Regierung z'ënnerstëtzen. Ouni si kéint de Staat seng Aufgaben net erfëllen a net funktionéieren.

Mee wat genau maachen d'Staatsbeamten iwwerhaupt?

Si schaffen zum Beispill an engem Ministère, wou si sech drëms këmmere, dat ëmzesetzen, wat de Minister hinne virgëtt. Och an Administratioune schaffen Staatsbeamten, wéi zum Beispill beim Finanzamt an och déi meescht Professe si Staatsbeamten.

De Staat beschäftegt allerdéngs net nëmme Staatsbeamten. De Staat stellt och Employéën an. Si si keng Beamten an hunn en anere Statut, nämlech dee vum „Employé de l'État“. Hiert Aarbechtsverhältnes gëtt duerch e Kollektivvertrag geregelt a si kënnen zum Beispill och entlooss ginn.

Wéi schonn ufanks gesot, gëtt et och nach Gemeengebeamten. Si schaffen zum Beispill an der Verwaltung vun enger Gemeng. De Gemeengebeamten steet nees an engem aneren Aarbechtsverhältnes, dat gesetzlech festgeluecht ass. Trotzdem ähnelt et deem vun de Staatsbeamten. Zum Beispill muss een och mindestens EU-Bierger a fir verschidde Poste Lëtzebuerger sinn. An et muss een och en Examen packen, fir Gemeengebeamten ze ginn.

Du gesäis also, et ass net einfach, den Iwwerbléck iwwer déi verschidden Aarbechtsverhältnissen ze halen. Déi nächst Kéier wous du vu Staats- oder Gemeengebeamten héiers, versteess du elo awer scho besser, wourëms et geet.